

Mambu ya yituka ya salamaka ntangu Yesu vandaka na zulu ya kulunsi

Baleso 2

Kikuma ya lesu to groupe ya baleso yai:

Na nsuka ya lesu yai to groupe ya baleso yai, bana ya classe ta bakisa nde nkailu ya Yesu pesaka na zulu ya kulunsi, yo vandaka kaka mosi bonso yo. Ntangu Yandi fwaka, Nzambi pesaka bidimbu mingi kusonga beto mambu yai. Yo yina, beto ta yamba na kiese lufwa ya Yandi sambu na beto, ti beto ta songa Nsangu ya Mbote yina na bantu ya nkaka.

Kuyidika na ntwala: Sambu na Ndambu ya 4, nge ta vanda na mfunu na bacercle zole—mosi ya mbwaki bonso ntangu na zulu, ti mosi ya ndombe.

Baverse ya Bible sambu na baleso yai 4:

Matayo 27, 35 --54; Marko 15 :22-39; Luka 23:32-47; Yoane 19 :16-37.

Verse ya Kulonguka:

Baebreo 9:14b

...Na Mpeve ya mvula na mvula Kristo kudipesaka na Nzambi bonso makabu ya kulunga. Menga na yandi ta katula bisalu ya kukonda mfunu na ntima na beto, sambu nde beto mona mpila ya kusadila Nzambi ya moyo.

Kuyidika na ntwala ya kulonga: Dessiner ti zenga bacercle zole. Colorer mosi mbwaki sambu yo songa ntangu, ya nkaka ndombe sambu yo songa mpimpa.

Nkunga sambu na baleso yai zole : Aleluya, Imene !

Kuyantika Leso:

Beto yonso me wa nde Yesu fwaka na zulu ya kulunsi sambu na masumu na beto. Kansi yandi vandaka na zulu ya kulunsi kuluta baheure sambanu. Na kati ya ntangu yina, mambu mingi ya kituka salamaka. Yo vandaka bonso Nzambi zolaka kubenda atasio na beto kuna sambu beto bakisa mambu ya nene ya Yesu vandaka kusala. Na bamposo yai zole beto ta mona mambu ya kituka ya salamaka ntangu Yesu vandaka na zulu ya kulunsi.

Leso 1

Mambu ya nene ya lesa yai na bandambu 4:

1. Basoda, ata bo zabaka ve bansilulu ya Nzambi ya tadilaka Mesia, bo kabisaka bilele ya Yesu, kaka na mpila ya bansilulu ya Bible tubaka (Bible ya Kuwakana ya Ntama tubaka yo na Nkunga Ch 22 Vs 19).

1A. Tanga:

Marko Ch 15 vs 25 Bo tulaka yandi na zulu ya kulunsi na nevere (9h) ya suka.	Yoane Ch 19 vs 23-24 23 Ntangu basoda me tula Yesu na kulunsi imene, bo bakaka bilele na yandi, bo yantikaka kukabisa yo na ndambu iya, ndambu mosi-mosi na konso soda. Bo bakaka mpi mwela na yandi; mwela yina, bo tungaka yo ve, kansi yo vandaka lele mosi kaka katuka na zulu tii na nsi. 24 Yo yina basoda tubanaka bo na bo nde: “Beto pasula lele yai ve, kansi kuluta mbote beto budila yo zeke, sambu na kuzaba kana nani muntu ta baka yo.” Mpidina, mambu ya ya bo sonikaka na Mukanda ya Nzambi yo lungaka nde: “Bo kabisaka bilele na mono, bo budilaka yo zeke.” Basoda salaka kaka mutindu yina.
--	--

1B. Yula bangyifula bonso yai—

Niveau Primaire:

- Bo tulaka Yesu na zulu ya kulunsi na inki ntangu? (Nevere [9h].)
- Na nima bo tulaka Yesu na zulu ya kulunsi sambu Yandi fwa, basoda salaka inki ti bilele na Yandi? (Bo kabisaka yo na kati na bo ti bulaka zeke sambu na kuzenga nani ta baka inki.)
- Sambu na inki bo salaka mpidina? (Sambu na kulungisa yina ya bo sonikaka na Nkunga Ch. 22 vs. 18 bamvula funda na ntwala mambu yai salamaka.)
- Bilele vandaka ikwa? (Iya, plus mwela. Ebuna, tanu.)

- Mvwela vandaka inki? (Chemise simple ti ndaa, ya bo sadilaka bonso lele ya nganda.)

Niveau Secondaire:

- Bantu ya nkaka kele na bampila ya nkaka ya kubula zeke. Beto zaba ve exactement inki metode bo sadilaka. Inki bampila kele kusalama mingi sika ya nge ikele? (Bana pesa mvutu.)
- Inki vandaka raison ya basoda bulaka zeke sambu na bilele ya Yesu? Keti nge banza nde bo vandaka kumeka kulungisa yina ya Bible me tuba? (Ikele ve. Bo salaka yo sambu na kuseka Yesu ti kusonga nde bo vandaka na controle na zulu na Yandi. Bo zolaka kusonga nde Yandi vandaka na ngolo ve, ata kucontroler bilele na Yandi. Bo zabaka ve mbikidulu ya bambikudi ya Nzambi sonikaka bamvula funda na ntwala na Bible.
(Histoire yai ke songa nde kieleka Nzambi vandaka kutwadisa mambu yina yonso, ata na ntangu ya bo banzaka bo vandaka na controle.)

1C. Kusonga inki me salama:

Kabisa bana na bandambu. Konso ndambu sala bageste sambu na kusonga histoire yai, mpila basoda kabisaka bilele ya Yesu ti bulaka zeke sambu na yo.

1D. Kuyimba ti kukina inki me salama:

Basoda sekaka Yesu

Bo bulaka zeke

Sambu na kubaka bilele na Yandi.

Bo me zaba ve nde

Nzambi mene songa nde

Yo fweti salama mutindu yina.

2. Basoda tulaka kisina ya vandaka kusaula Yesu nde, “Ntotila ya Bayuda.”

2A. Tanga:

Yoane Ch 19 vs 19-22

19 Pilate songaka bantu na kusonika na dibaya mosi nde: “Yesu, muntu ya Nazareti, mfumu ya Bayuda,” Ebuna bo tulaka yo na zulu ya kulunsi.

20 Bayuda mingi tangaka bisono yina, sambu kisika yina ya bo tulaka Yesu na zulu ya kulunsi, yo vandaka penepene na bwala. Bisono yina vandaka na bandinga yai: Kiarami, Kilatini, ti Kigreki. 21 Ebuna bambuta ya banganga Nzambi ya Bayuda tubilaka Pilate nde: “Nge lenda ve kubikisa bisono yina mpidina nde: ‘Ntotila ya Bayuda,’ kansi nge fweti sonika nde: ‘Muntu yai tubaka nde mono kele ntotila ya Bayuda.’ “

22 Pilate vutulaka nde: “Mambu yina ya mono me sonika, mono me sonika imene.”

2B. Yula bangyifula bonso yai--

Niveau Primaire:

- Inki basoda tulaka na zulu ya kulunsi na zulu ya ntu ya Yesu? (Kisina na kusonika, “Muntu yai ntotila ya Bayuda.”)
- Nani songaka bo kusonika kisina yina? (Pilate)
- Kisina yina vandaka kusonika na inki bandinga tatu? (Kiarami, Kilatini, ti Kigreki. Yonso vandaka bandinga ya bantu mingi tubaka ya sika yina.)
- Bamfumu ya banganga-Nzambi monaka kisini yina inki mutindu? (Bo zolaka yo kutuba nde “Yandi *tubaka* nde Yandi kele ntotila ya Bayuda.)
- Inki vandaka mvutu ya Pilate na mambu yina? (“Mambu yina ya mono me sonika, mono me sonika imene.”)

Niveau Secondaire:

- Inki mutindu kisina yai vandaka kaka mpila mosi ya nkaka ya kusaula Yesu? (Bo banzaka nde ntotila ta vanda na ngolo, ebuna yandi ta pesa bantu nzila ve kukanga yandi, kutula yandi na zulu ya kulunsi.)

2C. Kusonga inki me salama:

Mwana mosi kutelema, maboko na yandi na lweka bonso yandi kele na zulu ya kulunsi. Mwana ya nkaka sala bonso Pilate. Yandi songa nsadisi na yandi kusonika kisina kutuba nde, “Ntotila ya Bayuda.” Mwana ya tatu sala bonso soda, yandi sonika kisina yina. Yandi pesa yo na kimvuka ya bana ya ke sala bonso bo kele basoda ya Roma. Bo sala bonso bo ke bula yo na kulunsi na zulu ya ntu ya Yesu.

Kimvuka ya nkaka ya bana sala bonso bo kele banganga-Nzambi ya Bayuda. Bo kwenda na Pilate ti songa yandi nde kisina yina me tuba ve mbote. Mbote yo tuba nde “Yandi *tubaka nde* Yandi kele ntotila ya Bayuda.” Pilate ndima yo ve. Yandi nikisa ntu nde, “Ve,” ebuna yandi tuba nde, “Mambu yina ya mono me sonika, mono me sonika imene.”

2D. Kuyimba ti kukina inki me salama:

Ntotila ya Bayuda
Kisina tubaka yo
Pilate ndimaka ve
bo lenda changer yo
Yesu, Ntotila.

3. Yantika midi tii na 15 h, mpimpa ya ngolo kubwaka na ntoto.

3A. Tanga:

Luka Ch 23 vs 44 ti 45a
44-45a Kuvandaka kiteso ya bamidi; ntangu pesaka diaka mwina ve; mimpa bwaka na nsi yina yonso tii na trwazere ya nkokila (15h).

3B. Yula bangyifula bonso yai--

Niveau Primaire:

- Inki mambu ya yituka salamaka yantika midi tii na 15h? (Mwini pelaka diaka ve ti mpimpa kubwaka na zulu ya ntoto yina yonso.)
- Keti midi to 15h kele ntangu ya nge banza mpimpa ta bwa? Sambu na inki ve? (Ikele ve. Yai kele ntangu nde mwini kele na zulu ti yo ke pela ya kuluta.)

Niveau Secondaire:

- Bantu ya monaka mambu yina ya mpimpa—inki mutindu nge banza bo monaka yo? (Yo vandaka surprise, mambu ya yituka. Yo fweti benda atasio na bo kubakisa nde mambu ya nene vandaka kusalama.)

3C. Kusonga inki me salama:

Bana yonso lenda sala bonso bo kele kutala Yesu na zulu ya kulunsi. Nswalu nge tuba nde, “Mpimpa!” Ntangu nge tuba yo, bana yonso kanga meso na bo, ti bo sala bonso bo ke na boma mingi sambu na mpimpa yina.”

www.teachingforafrica.com

Ministères pour Chaque Enfant

3D. Kuyimba ti kukina inki me salama:

Bu Yesu fwaka na zulu ya kulunsi,
Na midi, mwini vandaka kupela,
Nswalu mwini manaka
Ti mpimpa kubwaka
Mambu ya nene kele kusalama!

4. Rido ya Tempelo pasukaka yantika na zulu tii na nsi.

4A. Tanga:

Matayo Ch 27 vs 51a

51 Ntangu yai, rido yina vandaka kukabula kisika ya nsiku ti kisika ya kuluta nsiku na kati ya Nzo-Nzambi ya Bayuda yo pasukaka na kati-kati, katuka na zulu tii na nsi...

4B. Yula bangyifula bonso yai--

Niveau Primaire:

- Na ntangu yina ya mpimpa yai kubwaka, inki pasukaka? (Rido ya Tempelo ya Bayuda, ya kabulaka sika ya nsiku ti sika ya kuluta nsiku.)
- Rido yai vandaka kukanga nzila nde bantu kota ve na kisika ya kuluta nsiku na kati ya nzo-Nzambi, kansi kaka Mfumu ya Banganga kukota kuna. Ntangu yo pasukaka, yo kangulaka nzila nde inki kusalama? (Yo kangulaka nzila nde beto bakwidi kukota na ntwala ya Nzambi.)
- Sambu na inki nge banza bantu lenda zola kukota kuna? (Kutana ti Nzambi, kuvanda na presence ya Nzambi, kusolula ti Nzambi, kulomba ndolula ya Nzambi.)
- Kupasuka yai yantikaka wapi? (Na zulu. Na zulu vandaka sika ya muntu lenda kuma ve, ebuna yo songa nde muntu pasulaka rido yina ve. Yo vandaka Nzambi Yandi mosi ya salaka yo.)

Niveau Secondaire:

- Keti nge lenda zaba to nge me mona baverse ya nkaka ya Bible ya songa nde na kati ya Yesu, beto bakwikidi kele na acces na Nzambi? (Baverset kele mingi. Ndambu ya mfunu kele

Roma Ch 5 vs 2; Efezo Ch 2 vs 18; ti Efezo Ch 3 vs 12. Bana tanga baverset yai ti songa disongidila na yo.)

- Inki bisalu bantu sala sambu bo ke meka kukwisa na Nzambi, sambu bo bakisa ve nde na kati ya Yesu, beto ke na inswa kukuma na ntwala na Yandi? Nde Nzambi yamba beto kukwisa? (Bana lenda tuba bisalu bonso: kukwenda na Nzambi na nzila ya mediateur to nganga, kusala bisalu mingi ya mbote, to kuwa boma kukuma na Nzambi ata fioti.)
- Kana nge kele mukwikidi, nge mpi, Nzambi kele kuyamba nge kukwisa na Yandi. Inki mutindu nge ke sadila privilege yina? (Mbote bana mona nde kieleka bo lenda kwisa na Nzambi ti songa Yandi konso mambu ya kele na ntima na bo.)

4C. Kusonga inki me salama:

Bana sambanu lenda songa inki me salama na histoire yai. Mosi ta sala bonso Yesu. Yandi ta telema bonso Yandi kele na zulu ya kulunsi. Mwana ya zole ta vanda “ntangu” na zulu. Yandi ta simba bacercle zole—mosi mbwaki ti mosi ndombe. (Nge lenda colorer baface zole ya kaka cercle mosi.) ‘Ntangu’, yandi telema na lweka ya Yesu. Ntete yandi songa cercle ya mbwaki, na nima yandi songa cercle ya ndombe, kusonga nde ntangu kumaka mpimpa. Mwana ya tatu telema na zulu ya mesa ti sala geste bonso yandi ke pasula rido ya ngolo, yantika na zulu tii na nsi. Bana tatu kota na sika ya me kangula ntangu rido pasukaka. Bo songa nde bo ke na kiese mingi kuna. Bana yonso ya nkaka ta tanga baheure.

Théâtre yai yantika na Yesu, yandi ke dila na mpasi na zulu ya kulunsi. Ntangu kele kupela na zulu. Bana tanga 9h, 10h, 11h. midi. Ntangu bo tuba nde ‘midi,’ mwana ya kele na cercle ya mbwaki, nswalu yandi balula yo, yo kuma mpimpa. Na nima, mwana telema na zulu ya mesa ti sala geste bonso yandi ke pasula rido ya Tempelo yantika na zulu tii na nsi. Bana tatu ya nkaka kwisa. Bo mona nde rido me pasuka, ebuna bo yituka nde bo lenda kota na meso ya Nzambi. Bo kota ti yantika kusamba. Bo fuluka na kiese ya mingi, sambu bo ke mona lukumu ya Nzambi.

4D. Kuyimba ti kukina inki me salama:

Nzambi pasulaka rido!

Yandi ke yamba beto

Ya’ sosa kintwadi na beto

Sambu Yesu katulaka masumu.

DEVOIR SAMBU NA BAKWIKIDI:

Beto me mona ndambu ya mambu ya yituka ya salamaka ntangu Yesu vandaka na zulu ya kulunsi.

Kieleka, Nzambi zolaka nde bantu yonso bakisa mambu ya nene ya Yesu vandaka kusala. Devoir mono www.teachingforafrica.com

Ministères pour Chaque Enfant

ke pesa nge mposo yai ikele kusonga mambu ya yituka ya nge me longuka bubuyai na bampangi 3 na kati. Benda mabanza na bo kuyindula inki mambu ya nene Yesu salaka sambu na bo.

KUBINGA BANA YA ZABA YESU NTETE VE:

Kana nge me kwikila na Yesu ntete ve bonso Ngulusi na nge, zaba nde Yesu salaka yai yonso ti Yandi monaka mpasi yai yonso na zulu ya kulunsi sambu na nge. Yandi zola nde nge tula ntima na Yandi sambu nge kuguluka. Nzila ya nkaka ikele ve sambu Nzambi kulolula nge, kaka Yesu. Kana nge zola tula ntima na Yandi bubuyai, kaka samba nge Yandi kukota ti kwikila na nge na nbe yonso, ebuna nge ta guluka. Kana nge binga zina na Yandi bubuyai, kana sambu na mbala ya ntete nge tula ntima na Yandi, na nima ya ecodim, kwisa songa mono nde, "Mono yambaka yandi." Mono ta vanda na kiese mingi, ti mono ta tula nge na lombilu.

===NSUKA YA LESO 1 ===

Leso 2

Bandambu 5-8

Kuyantika Leso:

Yula bana mambu 4 ya kuyituka ya salama ntangu Yesu vandaka na zulu ya kulunsi, ya beto monaka na mposo me luta. Bubuyai beto ta mona mambu 4 diaka ya yituka na salamaka kaka na ntangu yina.

5 Kaka na ntangu ya rido ya Tempelo pasukaka, ntoto mpi vandaka kunikana.

5A. Tanga:

Matayo Ch 27 vs 51b tii na 53
51b matadi pasukaka,
52 maziamu kukanguka, ebuna bantu mingi ya Nzambi, bayina me fwaka, bo telamaka.
53 Bo basikaka na maziamu; ebuna ntangu Yesu me telama na lufwa, bo kotaka na Bwala ya Santu. Bantu mingi monaka bo kuna.

5B. Yula bangyifula bonso yai--

Niveau Primaire:

- Kaka na ntangu ya rido pasukaka, inki mambu ya nkaka ya yituka salamaka? (Ntoto nikanaka. Matadi pasukaka, maziamu kukangulaka, ti ndambu ya bafwa telemaka.)
- Bafwa ya telemaka, bo monikaka na bantu wapi? (Na Bwala ya Santu, Yerusalemi)

Niveau Secondaire:

- Mambu yai ya yituka, inki disongidila na yo? (Nzambi zolaka kubenda atasio ya konso muntu. Yandi zolaka kusonga bo yonso nde mambu ya nene vandaka kusalama.)
- Keti nge bambuka bazina ya Yesu kudipesaka? Keti bazina na Yandi ya nkaka vandaka kutadila lufwa? (Ikele ve. Yandi tubaka nde Yandi vandaka Moyo [Yoane Ch 14 vs 6].)

5C. Kusonga inki me salama:

Bana yonso na kimvuka sala bonso ntoto kele kunikana. Nge longi losa ndambu ya matadi na ntoto kumona kana yo ta pasuka. Bana zole sala geste bonso bo kele bafwa ya kuzika. Ntangu ntoto yantika kunikana, maziamu na bo kanguka. Bo telema, bo kwenda kudisonga na bana ya nkaka.

5D. Kuyimba ti kukina:

Nzambi kunisaka ntoto

Bu Yesu kufwaka (sala bageste).

Mambu ya kuyituka

Kusonga mambu ya nene

Bu Yesu fwaka.

6 Basoda ya Roma, ata bo zabaka ve bansilulu ya Bible, bo tobulaka mpanzi ya Yesu, kansi bo bukaka ve makulu na Yandi, bonso bo vandaka yikama kusala. Mambu yai lungisaka bansilulu ya Exode Ch 12 vs 46; Kutanga Ch 9 vs 12; Bankunga Ch 34 vs 20; ti Zakaria Ch 12 vs 10.

6A. Tanga:

Yoane Ch 19 vs 31 tii na 37:

31 Bamfumu ya Bayuda zolaka ve nde bamvumbi ya bantu kubika na zulu ya bakulunsi tii na Kilumbu ya Kupema, sambu Kilumbu ya Kupema yina landaka vandaka kilumbu mosi ya santu mpenza. Yo yina bo kwendaka kulomba nzila na Pilate sambu bo kwenda kubuka makulu ya bantu yina vandaka na kulunsi, ebuna bo katula bo.

32 Ntangu yai, basoda kwisaka kubuka makulu ya muntu ya ntete yina vandaka na kulunsi kisika mosi ti Yesu, ebuna diaka, makulu ya muntu ya zole.

33 Ntangu bo kwisaka kukuma penepene na Yesu, bo monaka nde yandi me fwa dezia. Yo yina bo bukaka makulu na yandi ve.

34 Kansi soda mosi tobulaka yandi dikonga na mpanzi; nswalu menga ti masa kwisaka kubasika.

35 Muntu monaka mambu yina yonso ke tubaka kitemwe sambu na yo; kitemwe na yandi kele ya kieleka, sambu beno mpi kukwikila.

36 Mambu yina bwaka sambu mambu yai ya bo sonikaka na Mukanda ya Nambi yo kulunga nde: “Bo ta buka ata mukwa na yandi mosi ve.” (Kubasika Ch 12 vs 46; Kutanga Ch 9 vs 12; Bankunga Ch 34, vs 21)

37 Bo sonikaka diaka na kisika ya nkaka nde: “Bantu ta tala muntu yina ya bo tobulaka dikonga.” (Zakaria Ch 12 vs 10; Kusonga Ch 1 vs 7).

6B. Yula bangyifula bonso yai—

Niveau Primaire:

- Sambu na inki basoda bukaka makulu ya bantu ya bo fwaka na zulu ya bakulunsi? (Sambu bo kufwa kuluta nswalu, sambu bantu lenda bikala ve na zulu ya kulunsi na Kilumbu ya Kupema.

Kana muntu me bikala na zulu ya kulunsi na lumbu yina, yo ta benda makelele ti Bazwif.)

- Nani lombaka bo kubuka makulu ya bantu yina? (Bazwif, sambu na bansiku na bo ya tadilaka Kilumbu ya Kupema.)
- Bo kwendaka na nani kulomba mambu yina? (Na Pilate, Mfumu ya Roma na sika bo vandaka)
- Basoda bukaka makulu ya nani? (Bantu zole ya nkaka, babandi, ya fwaka nzila mosi ti Yesu)
- Sambu na inki bo bukaka ve makulu ya Yesu? (Bo monaka nde Yandi me fwa dezia)
- Bo salaka inki sambu na kuzaba nde Yesu me fwa ya kieleka? (Bo tobulaka yandi dikonga na mpanzi.)
- Inki salamaka ntangu yina? (Menga ti masa basikaka nswalu. Yai songaka nde Yesu me fwa dezia.)
- Inki mutindu beto zaba nde mambu yai yonso salama mutindu Bible ke songa beto? (Muntu ya sonikaka rapport yina vandaka kuna ntangu yina. Yandi monaka yo yonso.)
- Basoda zabaka ve bansilulu ya Bible na Kuwakana ya Ntama, kansi bo lungisaka bansilulu ya Bible zole kaka na mambu yai. Inki vandaka bansilulu yina? (Nde Mesia, ata dikulu mosi na yandi ta bukana ve, mpi nde bo ta tobula yandi dikonga.)
- Nge banza nde yai ke songa inki sambu na Yesu? (Yo ke songa nde kieleka Yandi vandaka Mesia.)
- Nge banza nde yai ke songa inki sambu na Ndinga ya Nzambi? (Ndinga ya Nzambi fweti lungisama kaka.)

Niveau Secondaire:

- Na kati ya bantwadisi ya Bayuda (Bazwif), kuvandaka bantu ya nkaka ya ta zaba bansilulu yina ya Kuwakana ya Ntama. Bo songaka Mfumu Pilate nde bo zolaka basoda kubuka makulu ya Yesu sambu bantu bikala na zulu ya kulunsi ve na Kilumbu ya Kupema. Keti nge banza nde yo lenda vanda mpi nde bo zolaka kusala na mpila nde bansilulu yina lenda ve kulungisama? Sambu na inki yina lenda vanda mambu ya mfunu?

(Mpila kele nde bo yindulaka mutindu yina. Yo vandaka mfunu sambu kana ata nsilulu mosi ya Mesia, yo lungisama ve na Yesu, yina ta songa nde Yesu lenda ve vanda Mesia.)

- Keti beto bantu lenda sala na mpila nde Nzambi kulungisa ve bansilulu na Yandi? Tala Yoane Ch 10 vs 35b.

(Mpila ikele ve ata fioti. Nzambi fweti lungisa bansilulu na Yandi kaka. Yina ya kele na Ndinga ya Nzambi, yo fweti salama kaka.)

6C. Kusonga inki me salama:

Bana sala bageste kusonga inki me salama na kitini yai ya histoire. Mwana mosi sala bonso Yesu; zole sala bonso babandi ya fwaka nzila mosi ti Yandi. Mosi sala bonso Mfumu Pilate, ti bayankaka sala bonso basoda ya Roma.

6D. Kuyimba ti kukina inki me salama:

Basoda kwenda kubuka makulu
Kansi Nzambi kangaka bo nzila
Sambu Bible tubaka ntama
Nde mukwa mosi ta bukana ve.

Ooo!!

Soda tobulaka Yandi na mpanzi
Menga n' masa basikaka
Sambu Bible silaka ntama
Nde bo ta tobula Mesia.

7. Soda ya vandaka kutala Yesu ti bantu ya vandaka ti yandi, bu bo monaka mambu yai yonso, bo bakisaka nde Yesu vandaka Mwana ya Nzambi.

7A. Tanga:

Matayo Ch 27 vs 54

54 Mfumu ya basoda ti basoda na yandi yina vandaka kutala Yesu, ntangu bo monaka ntoto ke nikana ti mambu yonso ke bwa, bo waka boma mpenza, ebuna bo tubaka nde: "Ya kieleka, muntu yai vandaka Mwana-Nzambi!"

7B. Yula bangyifula bonso yai—

www.teachingforafrica.com

Ministères pour Chaque Enfant

Niveau Primaire:

- Mfumu ya basoda ya Roma ti bo ya nkaka ti yandi, ntangu bo monaka bima yai, bo tubaka inki? (Ya kieleka, Yandi vandaka Mwana-Nzambi!)
- Bo waka inki na nsi ya ntima? (Bo waka boma mingi.)

Niveau Secondaire:

- Meka kuyindula bonso nge kele soda yina ya Roma. Nge ta vanda kuwa inki na nsi ya ntima? Nge ta vanda kuyindula inki?

(Mbala ya nkaka nge ta yindula bonso, 'Ai-yai! Kaka sesepiyai beto me fwa Mwana-Nzambi!' Mbala ya nkaka nge ta vanda na boma nde Nzambi fweti fwa nge to Yandi ta pesa nge ndola ya ngolo.

- Beto zaba ve inki mutindu soda ya Roma yina yindulaka ntangu yandi waka nde Yesu me telema na lufwa. Beto zaba ve kana yandi balulaka ntima ti kumaka longuki ya Yesu. Beto zaba nde yandi me bakisa Yesu vandaka nani. Keti muntu lenda zaba mambu ya kieleka sambu na Yesu, kansi yandi bikala na masumu na yandi, yandi zenga ve kulanda Yesu?

(Ee. Yo ke salama mbala mingi. Yo kele mambu mosi kuzaba Yesu kele nani. Yo kele mambu ya nkaka kulanda Yandi na luzingu na nge. Keti nge kele muntu ya zaba kaka, to nge kele mulandi kibeni ya Yesu?

7C. Kusonga inki me salama:

Mwana mosi sala bonso yandi kele Yesu. Yandi tula maboko bonso yandi kele na zulu ya kulunsi. Bana yonso ya nkaka, bo sala bonso bo kele Mfumu ya basoda ya Roma ti basoda ya nkaka ya vandaka ti yandi. Bo yonso tala Yesu bonso na kuyituka, ebuna bo yonso tuba nde, "Ya kieleka, Yandi vandaka Mwana-Nzambi!" Bo songa mawa ya nene sambu bo bakisa nde bo me fwa Mwana-Nzambi.."

7D. Kuyimba ti kukina inki me salama:

Yimba na mawa, bonso na mafwa:

Kieleka, Yesu Mwana-Nzambi,
Beto me sala kifu ya nene.
Kieleka, Yesu Mwana-Nzambi!

Na nima, yimba na kiese yonso:

www.teachingforafrica.com

Ministères pour Chaque Enfant

Kieleka, Yesu Mwana-Nzambi,
Yandi fwaka na sika na beto
Kieleka, Yesu Mwana-Nzambi.

Devoir sambu na bo ya me ndima Yesu dezia:

Ntangu Yesu vandaka kufwa na zulu ya kulunsi, Nzambi tindaka basina ya yituka sambu na kubenda atasio na beto. Nzambi zolaka nde bantu yonso kubakisa nde lufwa ya Yesu vandaka mambu mosi ya nene mpenza. Ata bantu me pesa bamakabu mingi na Nzambi, ntangu Yesu fwaka na zulu ya kulunsi, Yandi pesaka nkailu mosi ya nene, nkailu ya nsuka sambu na kukatula masumu yonso na beto. Yai vandaka nkailu Nzambi me kinga, nkailu ya manisaka mfuka yonso ya masumu na beto. Na mposo yai, keti nge ta songa banduku ti fami ti bantu ya bwala ya nge inki basina Nzambi pesaka ntangu Yesu kufwaka? Mbote bo zaba mambu yai mpi sambu yo benda bo kutula ntima na Yandi.

Kubinga bo ya me yamba Yesu ntete ve:

Nzambi tindaka basina yai yonso sambu muntu kubakisa mfunu ya nkailu ya Yesu. Yo kele mfunu mingi. Beto ta guluka, to beto ta vila mvu ya mvu, kaka na mvutu beto ta pesa na nkailu na Yandi. Ebuna, kana nge me ndima Yesu ntete ve bonso Mvulusi na nge, nge lenda bikala na nima ya Ecodim ti vanda awa (longi, songa wapi bo lenda kutana ti nge). Mono ta kwisa kusamba ti nge. Yo ta vanda kiese ya mingi kana nge ta kwisa kota na fami ya Nzambi bubuyai!

===

NSUKA YA BALESO YONSO 2

===

NB: Atasio, longi!

Ntangu yai, nge me manisa kusadila baleso yai. Baleso ya mpa ke kinga nge na Centre des Materiels, sika nge me defa baleso yai. Mabundu ya nkaka mpi ke kinga kudefa baleso yai sambu bo mona mpila kulonga bana na bo. Ntangu yai, vutula materiels yonso na sachet ti vutula yonso na Centre des Materiels ya MCE. Merci mingi sambu na collaboration ya nge !